

# CAÇA CHE DIRUN SAN JUAN MENAN

---

**1** <sup>1</sup>Dihvo vo Jesucristo ne, a va ye nde ro che metah cuhnde iyehñse. Ihyan min ne, anduhñeça Ndudo yahn Dendiohs che dechuh ye cava che ndedevahn ye uvo, cuahtenan vo vahchetero numacuahn ro. Nuhn ne, ndihchero nuhn ihyan man, chihnevan nuhn ndudo yahn ye man, dama cheh dama chih nuhn nduco ye man. <sup>2</sup>Ihyan min ne, quechica ye iyehñse cuh, ne nuhn ne, chinduco nuhn ihyan. Rahndudo nuhn ndudo yahn ye, rihnevan nchuhn, te a devano nuhn che cuçaco. Ihyan min ne, a nduco ye Dendiohs Chida, ate nda ye iyehñse cuh cava che ndedevahn ye uvo, cuahtenan vo vahchetero numacuahn ro. <sup>3</sup>Ndaconan rete cuande ndah nchuhn che chinduco nuhn ihyan min man, chihnevan nuhn ndudo yahn ye man, te nahn che conduco ne nuhn, cotahno vo Dendiohs Chida man, ihyan min che Daya ye man. <sup>4</sup>Condihchenan ndah ne che dirun yahn ne cava che numacuahn vedeyeno quendi ne cotahno ne ihyan.

## *Dendiohs ne, ndiyu ihyan nunde ye*

<sup>5</sup>Dendiohs ne, nduhça ama ndah dave yahn ne, tihça ama ndah ihyan ye, metah nde ama nunde yahn ye. Ndudo cuh ne, man Dihvo vo Jesucristo chicuahn ye nuhn, ne rete cuande nuhn nchuhn. <sup>6</sup>Ihyan che rahn ye che ritahno ye Dendiohs ate rahtechica ye vedeyeno yahn man ye, rahtendihco ye nunde ne, a ndero ndi che ndere rahn ye, te hua runeçade rahtechica ye. <sup>7</sup>Ate ndete che runeçade vatechico vo nduhça che nahn Dendiohs ne, ndahça cuahtenan vo nduco vih, ne nchahco ye nducuahn nunde yuhn vo, yahn che chih Daya ye, Dihvo vo

Jesucristo, chera yun yahn ye çavo vo. <sup>8</sup>Ndete che çahmo vo che metah nunde yuhn vo ne, rihncneh man vo uvo, nde hua cuçaco che rahñ vo. <sup>9</sup>Ndete che ntuma ino vo nunde yuhn vo ne, nchahco Dendiohs yuhn vo, te ihyan min ne, runecade ye, ne redinahn ye ndudo yahn ye. <sup>10</sup>Ate ndete che çahmo vo che hua chendihco vo nunde ne, duche rino vo Dendiohs, te anduhneça ndete che çahmo vo che ndere rahñ ye. Ndete che tihça ne, a ndero ndi che nde hua ritahno vo Ndudo yahn ye.

***Dihvo vo Jesucristo ne, rahñ nan ye uvo***

**2** <sup>1</sup>Dayá, dirún çaca cuh yahn ne çava che ndedecadino ne, ne hua ndere cuahtechica ne, cuahtendihco ne nunde. Ate ndete che va duh che quendihco nunde ne, va Dihvo vo Jesucristo, ne va tah ye vederihquentiyon che rahñ nan ye uvo nan Dendiohs Chida. Ihyan min ne, metah nde ama nunde yahn ye, <sup>2</sup>ne chihco mendahn ye ihyan, chih ye çava nunde yuhn vo man, nunde yahn nducoyaca ihyan iyehñse man. Nduco tihça ndo yan Dendiohs nduco nducoyaco vo. <sup>3</sup>Ndete che redinahn vo vederihquentiyon yahn ye ne, a devano cuçaco vo che ritahno vo ihyan. <sup>4</sup>Duh ihyan che rahñ ye che ritahno ye ihyan ate hua redinahn ye vederihquentiyon yahn ye ne, ndere rahñ ye. <sup>5</sup>Ate ndete che redinahn vo vederihquentiyon yahn Dihvo vo ne, a devano cuçaco vo che yahino vo Dendiohs numacuahn chedave yuhn vo man, che nedin yahn ye uvo man. <sup>6</sup>Duh ihyan che rahñ ye che a nedin yahn Dendiohs ihyan ne, nahn che runecade cochica ye nduhça che quechica Dihvo vo Jesucristo.

***Nahn che din yahino vo vih***

<sup>7</sup>Dihnó, dirún yahn ne, rentihyon yan vederihquentiyon che chihnde nde a rahñ me, chidevano ne nde ro che chitahno ne Dihvo vo Jesucristo. <sup>8</sup>Vederihquentiyon min, nducote dinahn Dihvo vo Jesucristo man, redinahn man ne man ne, ndahça che rentihyon yan yahn ne. Tihça, te ca retuhn Ndudo Ndah yahn Dendiohs ne, ca rihno vedetundo yahn ihyan.

<sup>9</sup>Duh ihyan che rahñ ye che a chenahn ye vederihquentiyon yahn Dendiohs, ate rendihche tan ye ihyan chenahn ne, ihyan min ne, riquendi ye vedetundo yahn ye, metah conahn ye.

<sup>10</sup>Ihyan che redin yahino ye ihyan chenahn ne, a chenahn ye

vederihquentiyon yahn Dendiohs, ne riquendi ye. A runecade vederendedecadino yahn ye, ne hua rahtendihco ye nunde.

<sup>11</sup>Me ihyan che rendihche t̄an ye ihyan chenahn ne, riquendi ye vedetundo yahn ye, nto ye nduhcā ama ihyan nan ve, nde hua devano ye ti ndā ti tuno ye. <sup>12</sup>Dayá, dirún yahn ne, te a nchahco Dendiohs nunde yahn ne che cuande yahn Dihvo vo Jesucristo. <sup>13</sup>Nchuhn ihyan ndico, dirún yahn ne, te nde a rahn me ne, a chitahno ne Dihvo vo Jesucristo, ihyan min che a va ye nde cuahn che metah cuhnde iyehnse. Nchuhn ihyan decahya, dirún yahn ne, te hua riquendi ne vederihquentiyon yahn chundah.

Dayá, dirún yahn ne, te a nedin yahn Dendiohs Chida nchuhn. <sup>14</sup>Nchuhn ihyan ndico, dirún yahn ne, te a chitahno ne Dihvo vo Jesucristo, ihyan min che a va ye nde ro che metah cuhnde iyehnse. Nchuhn ihyan decahya, dirún yahn ne, te ama yune no chihcoman ne vedeyeno yahn man ne man, ritahno ne Ndudo yahn Dendiohs numacuahn chedave yahn ne man, rahcotahn ne vederihquentiyon yahn chundah man.

<sup>15</sup>Hua dama co nchuhn nduco ihyan nunde, quendi ne vedeyeno yahn man ne, cuahtendihco ne nunde, te ihyan che riquendi ye vedeyeno yahn man ye ne, hua yahino ye Dendiohs Chida. <sup>16</sup>Tihcā, te che ndere rahtechica ihyan, rahtendihco ye nunde man, che idihya ye man, che redin yade ye man ne, nducuahn nunde chemin chan ne, a nan vederendedecadino yahn ihyan riquendāh, ndiyu Dendiohs che rihquentiyon ye chemin. <sup>17</sup>Nducoyaca ihyan che rahtechica ye vedeyeno yahn man ye, rahtendihco ye nunde ne, rendā ro che rihno ye. Ate ihyan che redinahn ye vederihquentiyon yahn Dendiohs ne, cuahtenan ye vahchetero numacuahn ro.

### ***Sahn che rendihche t̄an se Dihvo vo Jesucristo***

<sup>18</sup>Dayá, a cochi nino ro che nto iyehnse. Nchuhn ne, a devano ne te a va cade che ndā sahn duhtuno ihyan me che rendihche t̄an se Dihvo vo. Ama yahn se che nduhcā se sahn min ne, a ndā se. Chemin che a devano vo te a cochi nino ro che nto iyehnse. <sup>19</sup>Sahn chemin chan ne, a van dihno vo quendāh se, ate hua chitahno se Dihvo vo nduhcā che ritahno

vo. Tihc̄a, te ndete che chitahno se numa cūaco ne, hua din vih se. Ate ndiquend̄ah nducoȳaca se v̄an vo, chihco ro se che a devavih ndi se. <sup>20</sup>Ate nchuhn ne, hua d̄ama ri ne nduco sahn chahn, te din Dihvo vo Jesucristo che quenun Vaco Ndah yahn Dendiohs nchuhn, tumacadino ne ndudo ndah yahn ye. <sup>21</sup>Dirún yahn ne, te a chenahn ne ndudo min, ne a devano ne cha che cūaco, ne cha che hua cūaco. <sup>22</sup>Sahn che rah̄n se che ndiyu Dihvo vo Jesucristo che tend̄ahnun Dendiohs c̄ava che ndedevahn ye uvo ne, cuahnde chende se. Sahn che rendihche tan se Dihvo vo Jesucristo, Daya Dendiohs ne, racond̄ah ved̄ame se vederihquentiyon yahn ye man, vederihquentiyon yahn Dendiohs Chida man. <sup>23</sup>Ihyan che racond̄ah ved̄ame ye Dihvo vo Jesucristo, Daya Dendiohs ne, namin racond̄ah ved̄ame ye Dendiohs Chida. Ihyan che ritahno ye Dihvo vo Jesucristo, Daya Dendiohs ne, din yahn Dendiohs Chida ihyan.

<sup>24</sup>Chemin che nahn che quendi nchuhn numacuahn chedave yahn ne ndudo yahn Dihvo vo Jesucristo che chitahno ne a rah̄n me. Ndete che quendi ne ne, tuhme Dendiohs Chida man, Dihvo vo Jesucristo, Daya ye man ne, ndeva ye nchuhn. <sup>25</sup>Tihc̄a, te Dihvo vo ne, te ye ndudo yahn ye che ndeva ye uvo, cuahtenan vo vahchetero numacuahn ro.

<sup>26</sup>Nducote vate sahn che rihnc̄eh se ne, chemin che tihc̄a dirún yahn nchuhn. <sup>27</sup>Nducote din Dihvo vo Jesucristo che quenun Vaco Ndah yahn Dendiohs nchuhn ne, hua rendotenan ne nde ama ihyan che cacuahn ye nchuhn. Man Vaco Ndah yahn Dendiohs redin che ri devano nchuhn deman nducuahn dehtenduh che cūaco. Nduhc̄a che a ca cuande ne yahn Vaco Ndah yahn Dendiohs ne, cuiquendi ne, cochahtino ne Dihvo vo.

<sup>28</sup>Dayá, cuiquendi ne cochahtino ne Dihvo vo c̄ava che hua dehva rah̄co ne, nde hua co cuihn̄an ne, ndihchero ne ihyan cuahn che ndaconan chi tun ye. <sup>29</sup>Nducote a devano ne che ama ndah ihyan Dihvo vo Jesucristo ne, cuedevano ne te nducoȳaca ihyan che redin ye che ndah ne, a nedin yahn ye ihyan.

### *A nedin daya Dendiohs uvo*

**3** <sup>1</sup>Condihche nchuhn nduhc̄a che ama yahino Dendiohs Chida uvo, nedin daya ye uvo. Ihyan nunde ne,

nducote hua retumacadino ye t̄ač̄a Dendiohs ne, namin hua retumacadino ye che a nedin d̄aya ye uvo. <sup>2</sup>Dihnó che yahinó nchuhn, a nedin d̄aya Dendiohs uvo, nde metah tumacadino vo nduhc̄a che ama ndah ro yuhn vo cuahn che ndeva ye uvo. Ate a devano vo te cuahn che ndaconan chi tun Dihvo vo Jesucristo ne, ndo vo nduhc̄a m̄an ye, ndihchero vo ihyan. <sup>3</sup>Nducoȳaca ihyan che chenan ino ye che ndihchero ye ihyan ne, rihcom̄an ye vedeyeno yahn m̄an ye, ne rendo ye ihyan ndah nduhc̄a Dihvo vo Jesucristo. <sup>4</sup>Ate nducoȳaca ihyan che rahtendihco ye nunde ne, rahcot̄ahn ye vederihquentiyon yahn Dendiohs. A vederihquentiyon min che rihco ro nunde yahn ihyan. <sup>5</sup>Nchuhn ne, a devano ne te Dihvo vo Jesucristo ne, ndiyu ihyan nunde ye. Namin a devano ne te nd̄a ye muhn iyeh̄nse cuh, chihco mend̄ahn ye ihyan, chih ye c̄ava nunde yuhn vo. <sup>6</sup>Nducoȳaca ihyan che richahtino ye ihyan min ne, hua ndere rahtechica ye vedeyeno yahn m̄an ye, rahtendihco ye nunde, ne ihyan che ndere rahtechica ye vedeyeno yahn m̄an ye, rahtendihco ye nunde ne, nde hua ritahno ye ihyan, andahre tihc̄a r̄ahn ye. <sup>7</sup>Dayá, cuihco nchuhn cud̄ado che hua cah̄ncheh̄ nde ama ihyan nchuhn. Cuedevano ne te ihyan che runec̄ade rahtechica ye ne, ndah ihyan ye nduhc̄a Dihvo vo Jesucristo, <sup>8</sup>ne ihyan che ndere rahtechica ye vedeyeno yahn m̄an ye, rahtendihco ye nunde ne, riquendi ye vederihquentiyon yahn chundah, te a sahn min che can̄an quendihco se nunde. Ate Dihvo vo Jesucristo ne, nd̄a ye muhn iyeh̄nse cuh c̄ava che decuihno ye vederihquentiyon yahn se. <sup>9</sup>Nde ama ihyan che a nedin d̄aya Dendiohs ne, hua riquendi ye rechica ye vedeyeno yahn m̄an ye, rendihco ye nunde, te a ndahcorun ye vederendedecadino yahn ye. Hua co quendi ye condihco ye nunde, te a nedin d̄aya Dendiohs ihyan, ndo ye ihyan ra. <sup>10</sup>A ndero ndi ihyan che a nedin d̄aya Dendiohs ihyan. Namin a ndero ndi ihyan che a nedin yahn chundah ihyan. Tihc̄a, te nducoȳaca ihyan che hua redin ye che ndah m̄an, nducoȳaca ihyan che hua yahino ye ihyan chen̄ahn m̄an ne, hua yahn Dendiohs ihyan.

***Nahn che din yahino ama t̄ama vo vih***

<sup>11</sup>Nahn che din yahino ama t̄ama vo vih. Vederihquentiyon min ne, a devano nchuhn nde ro che chitahno ne Dihvo vo

Jesucristo. <sup>12</sup>Hua ndahc̄a che quendi vo yune yahn Caín, sahn min che dinahn se yahn chundah, chihno se dihno se. A devano vo te Caín ne, duhtuno ihyan se, ne chemin che chihno se dihno se che ndah ihyan ye. <sup>13</sup>Dihnó, hua dehva rahco nchuhn cuahn che rendihche tan ihyan nunde nchuhn. <sup>14</sup>A ndedevahn Dendiohs uvo van ihyan nunde che va che co ye castigo yah, din nunde yahn ye. A devano vo te cuahtenan vo vahchetero numacuahn ro, te redin yahino ama tama vo vih. Ihyan che hua redin yahino ye vih ne, metah ndedevahn Dendiohs ihyan, ne va che co ye castigo. <sup>15</sup>Nducoyaca ihyan che rendihche tan ye ihyan chenahn ne, dama ri ye nduco sahn rihno ihyan, ne a devano vo te nducoyaca sahn rihno ihyan, hua chenah ino se che ndeva Dendiohs sahn, cuahtenan se vahchetero numacuahn ro. <sup>16</sup>A devano vo nduhc̄a che yahino Dihvo vo Jesucristo uvo, chihco mendahn ye ihyan, chih ye cavo vo. Nahn che tihc̄a din yahino ama tama vo vih, andahre nde cahco mendahn vo uvo, coh vo cava vih. <sup>17</sup>Ndete che va che rechuhnun vo ate hua conan vahino vo dihno vo che va vederetahn yahn ye, conan vo ihyan ne, a ndero ndi che nde hua yahino vo Dendiohs. <sup>18</sup>Dayá, nde hua cochihve che dendudo cahmo vo che redin yahino vo vih. Tahque ndah ne, din yahino vo vih numa cuaco, conan vih vo nan vederetahn yuhn vo.

***Nduhc̄a che redin chahtino vo Dendiohs***

<sup>19</sup>Ndete che tihc̄a din yahino ama tamó vo vih ne, a devano vo che redinahn vo ndudo ndah yahn Dendiohs, ne vatemán ino vo. <sup>20</sup>Ndete che va deh cuande che hua vatemán ino vo ne, va Dendiohs che devano ye nducuahn, ne co din ye che cuahtemán ino vo. <sup>21</sup>Dihnó che yahinó nchuhn, ndete che vatemán ino vo ne, cochahtino vo Dendiohs, <sup>22</sup>ne dinahn ye nducuahn che caco vo ihyan, te redinahn vo vederihquentiyon yahn ye, redin vo dehtenduh che renan ino ye. <sup>23</sup>Nan nducuahn vederihquentiyon yahn ye ne, nahn ye che cotahno vo Daya ye, Dihvo vo Jesucristo, ne din yahino ama tama vo vih nduhc̄a che chihquentiyon Dihvo vo. <sup>24</sup>Nducoyaco vo che redinahn vo vederihquentiyon yahn Dendiohs ne, richahtino vo ihyan, ne rinduco ye uvo. A devano vo che rinduco ye uvo, te din ye che quenun Vaco Ndah yahn ye uvo.

***Vaco Ndah yahn Dendiohs man, vaco chihnga man***

**4** <sup>1</sup>Dihnó che yahinó nchuhn, hua ndetahno cotahno ne yahn sahn che rahn se che quenun Vaco Ndah yahn Dendiohs sahn. Cah yune ne che nte se, ne cuicarune ne sahn cava che cadino ne ndete che chenan cuma se vederihquentiyon yahn Vaco Ndah yahn Dendiohs, o vederihquentiyon yahn vaco chihnga. Tihca codin ne, te ama yahn se vatechica se rihncheh se, rahn se te ndudo yahn Dendiohs che rahndudo se. <sup>2</sup>Co cadino ne duh ihyan che quenun cuma ye vederihquentiyon yahn Vaco Ndah yahn Dendiohs, te va che cahma ye che Dihvo vo Jesucristo ne, ndo ye nduhca ihyan, nda ye muhn iyehense. <sup>3</sup>Ate nducoyaca sahn che hua tihca cahma se ne, hua chenan cuma se vederihquentiyon yahn Vaco Ndah yahn Dendiohs. Sahn chahn ne, chenun vaco chihnga sahn, chenan cuma se vederihquentiyon yahn sahn min che rendihche tan se Dihvo vo. A devano vo te sahn min ne, va che cochica se muhn iyehense, ne yahn sahn che vatechica se, chenan cuma se vederihquentiyon yahn se.

<sup>4</sup>Dayá, a nedin yahn Dendiohs nchuhn, ne a ndahco ndiya ne sahn chahn che vatechica se rihncheh se, te vederihquentiyon yahn Vaco Ndah yahn Dendiohs che quenun nchuhn ne, tahque yudo che co vederihquentiyon yahn chundah. <sup>5</sup>Sahn chahn ne, sahn nunde se, ne chemin che rente se dehtenduh che chihnga, rihcovan ihyan nunde. <sup>6</sup>Ate nuhn ne, a yahn Dendiohs nuhn, ne ihyan yahn ye ne, rihcovan ye che rahndudo nuhn, ne ihyan che hua yahn ye ne, hua rihcovan ye. Nduco chemin ne, co devano vo cha sahn che quenun Vaco Ndah yahn Dendiohs sahn, ne cha sahn che quenun vaco chihnga sahn.

***Yahino Dendiohs uvo***

<sup>7</sup>Dihnó che yahinó nchuhn, quenun cuma che din yahino ama tama vo vih, te redin Dendiohs che chenan cumo vo vedeyahino. Adecoduhno ihyan che quenun cuma ye vedeyahino ne, ritahno ye Dendiohs, ne a yahn ye ihyan. <sup>8</sup>Ihyan che hua chenan cuma ye vedeyahino ne, hua yahn Dendiohs ihyan, te ihyan yahn Dendiohs ne, redin Dendiohs

che chenán cuma ye vedeyahino. <sup>9</sup>Chihco ro Dendiohs che yahino ye uvo, te andahre ama ndiyahn ra Daya ye, ate dechuh ye ihyán muhn iyehnse, çava che ndedevahn ye uvo, ne cuahtenan vo vahchetero numacuahn ro. <sup>10</sup>Yahino vo Dendiohs, ate tahque chahte vedeyahino yahn man ye che co vedeyahino yuhn vo, te dechuh ye Daya ye, chihco mendahn ye ihyán, chih ye çava nunde yuhn vo. A tihça ndo yan Dendiohs nduco nducoyaco vo.

<sup>11</sup>Dihno che yahino nchuhn, nducote tihça din yahino Dendiohs uvo ne, quenán cuma che din yahino ama tama vo vih. <sup>12</sup>Nde ama ihyán hua ntihche ye Dendiohs. Ate ndete che din yahino ama tama vo vih ne, nedin yahn Dendiohs uvo, conduco ye uvo, ne cuahtenan cumo vo vedeyahino yahn ye. <sup>13</sup>A devano vo te a yahn Dendiohs uvo, rinduco ye uvo, te a din ye che quenun Vaco Ndah yahn ye uvo. <sup>14</sup>Nuhn ne, a devano cuaco nuhn, ne rahndudo nuhn ndudo yahn che a dechuh Dendiohs Chida Daya ye, çava che ndedevahn ye ihyán iyehnse. <sup>15</sup>Adecoduhno ihyán che çahma ye numacuahn chedave yahn ye che Dihvo vo Jesucristo ne, Daya Dendiohs ihyán ne, nedin yahn Dendiohs ihyán, ne conduco ye ihyán.

<sup>16</sup>A devano cuaco vo che yahino Dendiohs uvo. Ihyán min ne, quenán cuma ye vedeyahino, ne nducoyaca ihyán che chenán cuma ye vedeyahino ne, nedin yahn Dendiohs ihyán, rinduco ye ihyán. <sup>17</sup>Tihça cuahtenan cumo vo vedeyahino çava che hua dehva rahco vo nda ro che techecade Dendiohs yahn ihyán. Hua dehva rahco vo nda ro min, te numanahn che chenán vo iyehnse ne, quendi vo yune yahn Dihvo vo Jesucristo, cuahtenan cumo vo vedeyahino nduhça man ye. <sup>18</sup>Ihyán che chenán cuma ye vedeyahino ne, vateman ino ye nan Dendiohs. Ate ihyán che hua vateman ino ye ne, vahino ye che co ye castigo, te hua chenán cuma ye vedeyahino.

<sup>19</sup>Uvo ne, yahino vo Dendiohs yahn che menan vihca din yahino man ye uvo. <sup>20</sup>Ihyán che rahn ye che yahino ye Dendiohs ate rendihche tan ye ihyán chenahn ne, hua cuaco che rahn ye, te ndete che hua yahino ye ihyán che dama chenán ye iyehnse nduco vih ne, hua co din yahino ye Dendiohs che nde hua rendihche ye ihyán. <sup>21</sup>Man Dendiohs chihquentiyon ye che din yahino vo ihyán man, din yahino ama tama vo vih man.



*Ihyan che ritahno ye Dihvo vo Jesucristo ne,  
rihcoman ye vedeyeno yahn man ye*

**5** <sup>1</sup>Nducoyaca ihyan che ritahno ye che Dendiohs dechuh ye Dihvo vo Jesucristo cava che ndedevahn ye ihyan iyehse ne, ihyan chahn ne, a nedin daya Dendiohs ihyan. Ihyan che yahino ye Dendiohs Chida ne, namin yahino ye nducoyaca ihyan che a nedin daya ye. <sup>2</sup>Cuahn che yahino vo Dendiohs, redinahn vo vederihquentiyon yahn ye ne, namin yahino vo nducoyaca ihyan che a nedin daya ye. <sup>3</sup>Cuahn che yahino vo Dendiohs ne, redinahn vo vederihquentiyon yahn ye. Vederihquentiyon yahn ye ne, nde hua vahche cava che dinahn vo. <sup>4</sup>Nducoyaca ihyan che a nedin daya Dendiohs ihyan ne, rihcoman ye vedeyeno yahn ye che redin che rahtendihco ye nunde. Uvo ne, nducote ritahno vo Dihvo vo Jesucristo ne, rihcoman vo vedeyeno yuhn vo che redin che rahtendihco vo nunde. <sup>5</sup>Ihyan che ritahno ye che Dihvo vo Jesucristo che Daya Dendiohs ne, atenan ihyan chahn che ri rihcoman ye vedeyeno yahn ye che redin che rahtendihco ye nunde.

*Dihvo vo Jesucristo ne, ihyan min che Daya Dendiohs*

<sup>6</sup>A devano vo te Dihvo vo Jesucristo ne, Daya Dendiohs ihyan, te tihca rahn Dendiohs cuahn che chedenune ye man, tihca chihco ro man ye cuahn che chih ye, chera yun yahn ye man, tihca rete Vaco Ndah yahn Dendiohs che recadino vo man, ne a devano vo te Vaco Ndah yahn Dendiohs ne, hua rihneh. <sup>7</sup>Vahchetero ne, Dendiohs Chida man, Daya ye che dechuh ye nduco ndudo yahn ye man, Vaco Ndah yahn ye man, rete ye, recadino vo che cuaco chemin. Ihyan chahn ne, ama no vederihquentiyon chenan cuma ye. <sup>8</sup>Muhn iyehse cuh ne, a devano vo te Dihvo vo Jesucristo ne, Daya Dendiohs ihyan, te tihca rahn Dendiohs cuahn che chedenune ye man, tihca chihco ro man ye cuahn che chih ye, chera yun yahn ye man, tihca rete Vaco Ndah yahn Dendiohs che recadino vo man. <sup>9</sup>Ritahno vo ndudo che rente ihyan yahn Dihvo vo Jesucristo, che ihyan min che Daya Dendiohs. Ate nde tahque nun ritahno vo ndudo che rete man Dendiohs che ihyan min che Daya ye. <sup>10</sup>Ihyan che ritahno ye Dihvo vo Jesucristo ne,

a devano cuāco ye che ihyan min che Daya Dendiohs. Ihyan che hua ritahno ye ne, ducherino ye Dendiohs, te andahre rāhn Dendiohs che ihyan min che Daya ye, ate hua ritahno ye. <sup>11</sup>Rāhn Dendiohs ndiyu demān che a ihyan min che Daya ye, ate namin rāhn ye te ihyan che ritahno ye ihyan ne, ndevahn ye, ne cuahtenan ye vahchetero numacuahn ro. <sup>12</sup>Ihyan che ritahno ye Dihvo vo Jesucristo, Daya Dendiohs ne, cuahtenan ye vahchetero numacuahn ro. Ate ihyan che hua ritahno ye ihyan ne, nde hua ndāca vahchetero cuahtenan ye.

<sup>13</sup>Tihcā dirún yahn nchuhn che ritahno ne Dihvo vo Jesucristo, Daya Dendiohs, cāva che codevano cuāco ne te cuahtenan ne vahchetero numacuahn ro.

<sup>14</sup>Richahtino vo Dendiohs, ne a devano vo te nducuahñ che cāco vo ihyan nduhneva che renan ino ye ne, te ye uvo. <sup>15</sup>Nducote a devano vo che te ye dehtenduh che cāco vo ihyan ne, din vo cuande anduhneca ndete che a va tāh vo dehtenduh che rico vo.

<sup>16</sup>Ndete che cadino nchuhn che rendihco āma cha dihno ne nunde che hua din che conda ye ne, covāh ne cāva ye, ne nchahco Dendiohs yahn ye. Ate cuihco ne cudādo che ndiyu nunde che din che conda ye, te va nunde che redin che rinda ihyan, ne hua rihquentiyón che covāh ne cāva ihyan che rahtendihco ye nunde chemin chan. <sup>17</sup>Nducuahñ dehtenduh che chihngā che redin ihyan ne, nunde. Ate va nunde che hua redin che conda ye.

<sup>18</sup>A devano vo te nducoyāca ihyan che a nedin daya Dendiohs ihyan ne, hua ndere rahtechica ye, rahtendihco ye nunde, te Dihvo vo Jesucristo, Daya Dendiohs ne, redin ye cudādo ihyan chahn, ne hua co cahcantiyon chundah ihyan.

<sup>19</sup>A devano vo che yahn Dendiohs uvo, ne nducoyāca ihyan nunde ne, vate ye tāh chundah.

<sup>20</sup>Namin a devano vo che Dihvo vo Jesucristo, Daya Dendiohs ne, ndā ye iyehnse, chicuahñ ye uvo, tihyon yune ye uvo che cotahno vo āma no Dendiohs, ihyan min che va ye vahchetero. Uvo ne, ndichahtino vo ihyan. Namin ndichahtino vo Daya ye, che mān ye dechuh ye. Chemin che cuahtenan vo vahchetero numacuahn ro. <sup>21</sup>Dayá, cuihco nchuhn cudādo, condi ne cotahno ne dehtenduh che ndere redin ihyan dendiohs yahn ye. Tihcā co.